

Kōrero

Pānui

Tuhituhi

Pāngarau

Tau 5

Kua waihangatia Ngā Whanaketanga Rumaki Māori kia mōhio ai tātou kei whea tō tamaiti i roto i ngā mahi ako i Te Reo Matatini me te Pāngarau.

E hāngai pū ana ngā whanaketanga ki te Marautanga o Aotearoa, ko te whakaako i ngā wāhanga ako katoa, arā – Te Reo Māori, te Pāngarau, te Pūtaiao, ngā Tikanga ā-Iwi, te Hauora, Ngā Toi, Te Reo Ingarihi me te Hangarau.

Me mātua whakarato te kura o tō tamaiti i ētahi pūrongo ā-tuhi e rua i te iti rawa ki a koe i ia tau. Mā aua pūrongo koe e whakamōhio e rere pēhea ana tō tamaiti i runga anō i Ngā Whanaketanga me te Marautanga. Mā te kura hoki tana kōpaki mahi e homai, heoi ki te kore, tonoa te kaiako kia whakaatu mai i ētahi tauira o ana mahi.

Mō te pukaiti nei, kua kapohia ngā momo akoranga a tō tamaiti i tana tau tuarima i te kura – ā-kōrero, ā-panui, ā-tuhituhi, ā-pāngarau anō hoki. He kaponga noa iho ēnei e kite ai koe e pēhea ana ōna mōhiotanga, ōna āheinga hoki i roto i ēnei wāhanga ako.

Mēnā kua uru atu tō tamaiti i nā tata ake ki roto i te mātauranga rumaki ki te reo Māori, tērā pea ka paku rerekē te āhua e aromatawaihia ai – hei whakaata i tōna roa i roto i te mātauranga rumaki. Kōrero ki tō kaiako mēnā he āwangawanga ōu – māna e whakamārama ki a koe kei te pēhea te haere o āna mahi ako.





Kōrero

I te tau tuarima i te kura, ko te reo kōrero o tō tamaiti kei te tīmatanga o te taumata 3 o te marautanga.

E whakawhanake ana tō tamaiti i tana āheinga ki te tātari i ngā kōrero ā-waha, ā, ka hōhonu ake tana whai whakaaro ki ana kaupapa kōrero. Ina kōrero ia, ka uru mai te reo peha – he kīwaha pea, he kupu whakarite, he whakataukī rānei.

E ako ana tō tamaiti ki te:

- kōrero kia tika ake te rere, te tangi me te mita o te reo Māori
- whakauru i te reo whakaahua, pērā i te tūāhua, i te tūkē me te kupu whakarite ki āna kōrero
- whakapuaki i ōna whakaaro i roto i ngā horopaki ōpaki (hei tauira, i te taha o ōna hoa), ōkawa hoki (i te marae pea).

He tauira o ngā mahi kōrero, mahi whakarongo

- He mahi tuakana-teina – Ka mahi tahi rāua ko tētahi teina i te kura ki te hanga poi. Ka rere tahi te reo tohutohu, te kupu hāngai tonu ki te kaupapa, me te reo whakatenatena ki tana teina.

I te kāinga

- Whakawhitiwhiti kōrero kōrua ko tō tamaiti – He aha ōna whakaaro? He aha i pērā ai ōna whakaaro?
- Kia hoki mai tō tamaiti i te kura, pātai atu he aha ngā āhuatanga i pai ki a ia, he aha hoki āna akoranga – “He aha ngā mahi pārekareka rawa i te kura i tēnei rā?”, “He aha tētahi mea e mōhio ana koe i tēnei rā, kāore koe i mōhio inanahi?”

Pānui

I te tau tuarima i te kura, ko te reo pānui o tō tamaiti kei te tīmatanga o te taumata 3 o te marautanga. E pānui ana ia i ngā pukapuka kei waenga o te Kete Pīngao.

E taea ana e tō tamaiti te pānui i te whānuitanga o ngā tuhinga pohewa, tuhinga pono hoki. E tautoko ana ēnei tuhinga i ana akoranga puta noa i ngā wāhanga ako (i te Pūtaiao, te Tikanga ā-Iwi, te Hauora, te aha atu).

E ako ana tō tamaiti ki te:

- rapu māramatanga i ngā hoahoa, i ngā pikitia
- kite ko ētahi kupu me ētahi kiānga, pēnei i te 'nā reira', me te 'heoi', he tohu e whai ana tētahi whakarāpopotonga
- tohu i ngā wāhanga o te pukapuka, me te whakamahi i ēnei hei kimi pārongo – ngā ihirangi, te whakarāpopotonga, te kupu taka
- kite i te tikanga o ētahi kupu pūhui, nā runga i te aro ki ngā wāhanga e mōhiotia ana, hei tauira, rorohiko = roro + hiko
- pānui ā-waha i ngā kōrero a ngā kiripuaki, me te whakarekē i tōna reo kia hāngai ki ia kiripuaki.

Kua wehewehe ngā pukapuka ki roto 'Kete'. Tīmata ana ki te Kete Harakeke – he māmā, he poto te tuhinga. Ka piki ake ki te Kete Kīkie, ka piki anō ki te Kete Pīngao, ā, ki te Kete Miro rā anō. Kei ia pikinga kete ka uaua ake, ka matatini ake te tuhinga. Hei tana tau tuaono i te kura ko te tikanga e pānui ana tō tamaiti i ngā pukapuka uaua ake o te Kete Pīngao.



Ko ētahi āhuatanga o te pukapuka Pīngao i tēnei reanga

- He whānui ake ngā horopaki.
- He nui te whakawhitiwhiti kōrero a ngā kiripuaki.
- He reo peha, pēnei i te kiwaha, te whakatauki me te kupu whakarite.
- Kua whakaritea, kua wehewehea ngā ariā ki ōna anō kōwae.

I tō tamaiti e pānui ana i tēnei kōrero, tērā pea ka:

- matapakia e ia i tae pēhea mai ōna tūpuna ki Aotearoa, ā, he aha hoki te take i tae mai ai
- pānuitia e ia te upoko/taitara me te whārangī tuatahi, kātahi ka matapae he aha te kaupapa o te tuhinga
- pānui ia me ngā reo rerekē, ngā mita rerekē hoki hei reo mō ngā kiripuaki rerekē.

I te kāinga

- Me pānui hoki koe i te pukapuka e pānuitia ana e tō tamaiti – matapakia ō kōrua whakaaro mō te tuhinga.
- Kia kaha tonu ki te pānui ki tō tamaiti me te toro hoki i ngā whare pukapuka.
- Kimihia ngā pukapuka mō ngā kiriata, whakaaturanga pouaka whakaata rānei – kia ako tō tamaiti he kawenga katoa ēnei i te tuhinga kotahi.
- Rapua tahitia ētahi pārongo – mā te papakupu, te puka whakamārama, te Ipurangi, ngā moheni, ngā whakapapa, ngā pukapuka mahere whenua rānei.




Tuhituhi

I te tau tuarima i te kura, ko te reo tuhituhi o tō tamaiti kei te tīmatanga o te taumata 3 o te marautanga.

E kaha ana tō tamaiti te tuhi kōrero whakaahua, ki te whakapuaki i ōna whakaaro, i ōna wheako hoki. Ko ngā pārongo ka whakaurua, he mea tiki atu i ētahi atu wāhanga ako – nā roto i te kōrero, i te whakarongo, i te pānui anō hoki mō aua kaupapa.

E ako ana tō tamaiti ki te:

- kōwhiri i te huarahi pai katoa hei whakapuaki ā-tuhi i ōna ariā, i tana kaupapa rānei
- whakarite i tana tuhinga, ki te whakauru taipitopito hei tautoko i ōna ariā matua, me te whakakōwae i ngā ariā
- kōwhiri i ngā kupu me ngā kianga e hāngai ana ki te kaupapa, ki ngā kaipānui rānei.



I tēnei tuhinga a te tamaiti nei, kua:

- whakamahi i te whānuitanga o ngā kupu e hāngai pū ana ki te momo tuhinga
- whakatika i te takotoranga o ngā rerenga, te tātaki o ngā kupu, me ngā kārawarawatanga.
- whakamahi i ngā āhuatanga whakaraupapa o te tuhinga hei āwhina i te kaipānui – ngā tapanga me ngā tapanga iti
- whakamahi i ngā momo hangarau pēnei me ngā pūmanawa rorohiko
- whiriwhiri i ngā whakaahua e tika ana.

I te kāinga

- Tuhia ngā tīwhiri mō tētahi Rapunga Hēki Aranga, Rapunga Taonga rānei.
- Whakakaongia ngā tino tohutaka a tō tamaiti – ki te rorohiko, ki te pukapuka, ki te kōpaki rānei.
- Kōwhiria tētahi whakataukī, pepeha rānei – tuhia ki runga kanawehi, whakarākeitia hei koha mā te pēpi hou, tētahi whanaunga, hoa rānei.
- Whakaritea tētahi 'Ipu Ranunga Tunu Pihikete'. Tuhia ngā kai o roto me nga tohutaka, ā, tukuna atu hei koha.
- Whakatītinahia tō tamaiti ki te tuhi rātaka – ki te pukapuka, ki te rorohiko rānei – me te tuhituhi e pā ana ki āna mahi o ia rā, me ōna kare ā-roto hoki.



Pāngarau

I te tau tuarima i te kura, ko te mahi pāngarau a tō tamaiti kei te tīmatanga o te taumata 3 o te marautanga. He 50-70 ōrau o ngā mahi pāngarau, he aro ki te whāwhā i ngā tau.

Ka whakaoti rapanga tūturu ia me te whakamahi anō i ōna māramatanga ki te tau, te taurangi, te āhuahanga, te ine me te tauanga. He maha ngā huarahi, ngā takahanga ka whāia hei whakaoti rapanga. Me whiriwhiri e ia ko ēhea ngā tikanga whakaoti rapanga tika hei hāpai māna.

E ako ana tō tamaiti ki te:

- whiriwhiri i te tikanga tōtika mō te whakaoti rapanga (e whai wāhi mai ana ēnei mahi: +, -, ×, ÷) me te whakamārama atu ki ētahi atu
- whakamahi i ngā meka matua hei rapu i ngā meka kāore e mōhiohia ana, me te kimi i ngā hautau o ngā huinga, ngā āhua, me nga rahinga
- whakarōpū i ngā āhua ahu-2, ahu-3, me te whakamārama i ngā tikanga whakarōpū
- whakamahi i ngā tohu tukutuku (runga mahere) me ngā ahunga kāpehu ki te whakaatu wāhi
- tūhura i te pāpono, mā te whakarārangi i ngā putanga maha ka taea.



He tauira rapanga pāngarau

Anei tētahi mahere. He aha ngā mea kei te E3 me te K4? Kei whea te taonga?

Me hoki te kaitiora ki tana kaupuke. Me ahu pēhea ia (ki tā te kāpehu)?

I te kāinga



He hira, he pārekareka hoki te pāngarau i roto i ngā mahi o ia rā. Kua rerekē pea te whakaoti rapanga mai i te wā i a koe i te kura. Mā tō tamaiti koe e ako ki tāna e mōhio ana.

Ngā tau me ngā tauira

- Pānuihia ngā tau nui puta noa – tekau mā iwa mano, e toru rau, rua tekau mā toru.
- Akohia ngā takirua tau ki te 100 – “E 81 ka tāpiri aha, ka 100?”
- Pānuihia ngā tohu tātai waka.
- Kimihia, raupapahia ngā rā whānau o te whānau tonu, me ngā hoa. Tuhia he maramataka whakamahara i a koe ki aua rangi.

Ngā mahi o ia rā

- Whakaharataungia ngā papatau whakarea (tae atu ki te 10 x 10).
- Te penapena pūtea mō tētahi kaupapa pērā i te tunu keke.



Ngā mihi ki a rātou mā kua tautoko i te kaupapa nei. Ngā mihi hoki ki te ākonga, nāna te tuhinga i te wāhanga Tuhituhi o tēnei pukaiti.

He kōrero anō mō Ngā Whanaketanga Rumaki Māori me Te Marautanga o Aotearoa kei te pae tukutuku o Te Tāhuhu o te Mātauranga, www.minedu.govt.nz.

Kaitā pikitia: Ellie May Logan.

Kaihoahoa: Spencer Levine.

Ko te pukapuka i te wāhanga Pānui, ko *Ngā Kai i Ngaro*, he pakiwaitara Māori nā Joy Cowley i tuhi ki te reo Ingarihi, ā, nā Joe Malcolm i whakamāori.

I whakaputaina tēnei pukaiti i te tau 2014 mō Te Tāhuhu o te Mātauranga e Hana Limited.

Mana pupuri © Te Tāhuhu o te Mātauranga, 2014.

Nama take: 710945



ZF 9995

